

AJPOPAB' RECH PAXIL KAYALA'

TAQANIK KAB'LAJUJ, JUNAB' JOQ'O' JUWINAQ

PAXIL KAYALA' JUWINAQ OXIB' Q'IJ RECH RI UWAQ IK', JUNAB' JOQ'O' JUWINAQ.

RI AJPOP RECH PAXIL KAYALA'

XA K'U RUMAL

Ri Ajpop rech we Tinamit Paxil Kayala' xuquje' ri Uwokaj Q'atb'al tzij xkiq'at ri Taqanik job', waqib', wuqub', wajxaqib' xuquje b'elejeb', junab' joq'o' juwinaq, k'amom uq'ab'al xuquje' k'ak'arisam pa ri Taqanik wajxaqib' b'elejeb', juwinaq jun xuquje' juwinaq keb' junab' joq'o' juwinaq rech ri B'anib'al Taqanawuj, jawi kkiq'alajisaj xuquje' kkiq'at ri Taqanik pa uwi' ri chajinem chi uwach k'axk'olil tajin kk'ulmataj pa ronojel rulewal ri amaq', rumal ri k'ulmatajem ya'om ub'ixik kumal ri Wokaj Utwachil pa Ronojel Uwachulew, jachin taq xkiq'alajisaj ri k'axalaj yab'il ub'i' COVID-19. Are k'u wa' xb'anowik chi rajawaxik xchajix pa aninaqil ri utzwachil pa taq ri amaq' rech ch'aq'ap ja' xuquje' pa we amaq', rech utaqexik ri Chak patan chech Uq'atuxik xuquje' Uchupisaxik uwach ri yab'ilal coronavirus (COVID-19) pa we tinamit Paxil Kayala' rumal ri Q'atb'al Tzij rech Utwachil xuquje' Patanem Winaqilal.

XA K'U RUMAL

Chi pa taq we q'ij ri', tajin kjub'unik xuquje' kek'iyar ri winaq chech ri yab'il ub'i' COVID-19, pa we rulewal ri tinamit Paxil Kayala', rumal ri tajin kk'ulmatajik xuquje' ri kuta ri Taqanik pa Kiwi' Uwinaqil Tinamit rachi'l ri Taqanik rech Utwachil, sib'alaj rajawaxik chi konojel taq ri wokaj rech utzwachil xuquje' nik'aj chik wokaj e kachi'l konojel taq ri komon rech kkiya ri kitob'anik chech utaqexik ri taqanik rech ch'aq'ap ja' xuquje' pa we amaq', chech uchajixik, uq'atuxik xuquje' uchupisaxik ri yab'ilal rech ktob'an chech uq'atuxik man kjub'un ta ri uchikopol chi kixo'l ri winaqil.

XA K'U RUMAL

Ruk' we q'alajisam chi kanoq xuquje' rumal chi k'o pa kiq'ab' we ucholajil ri utzwachil xkiya ub'ixik xuquje' xq'alajisaj ri ub'e'al chi kterne'x na ri Taqanik rech ri chajinem chi uwach ri k'axk'olil pa amaq', rumal wa' sib'alaj rajawaxik kb'an ri kuta taqanik ya'om ub'ixik chi kiwach ri tinamit, rech ri q'atb'al tzij kkwonik kuq'at chi nik'aj taqanik pa uwi' uchajixik ri utzwachil, ri utzilal pa kik'aslemal ri winaq, rumal wa' kunajtajisaj q'ij chech we q'atom chajinem ri kkiq'is uq'ij chech we keb' q'ij rech we uwuq ik' chech we junab'.

RUMAL K'UT:

Ri chak patan q'atatal pa taq ri q'ataj 1°. 2°. 93, 94, 95, 138,139, 182 xuquje' 183 pa ri tz'ib' e) xuquje' f), rech ri Nim Taqanawuj pa Paxil Kayala'; rachi'l taq ri q'ataj; 6, 7, 16, 17, 30, 36, 39, 40, 47, rech ri Taqanik 114, junab' 97. Rech ri B'anib'al Taqanawuj, ri Taqanik rech Eqelenib'al Taqanem; xuquje' ri ajilab'al 1, 2,14 rachi'l 15 pa ri Taqanik wuqub' rech Nim Riqow ib' rech Amaq' pa tinamit Paxil Kayala', Taqanik pa kiwi' ri Winaqilal xuquje' ri 58, 60, 75 rech ri Taqanik rech Utwachil.

Ri wokaj uq'ab' q'atb'al tzij

Kkiq'ato

Q'ataj jun: Unajtajisaxik q'ij: knajtajisax juwinaq lajuj q'ij chik ri taqanik rech chajinem chi uwach ri k'axk'olil kk'ulmataj pa we amaq' q'atatal pa ri Taqanik job'-junab' joq'o' juwinaq, rech ri job' q'ij pa urox ik', junab' joq'o' juwinaq, k'amom uq'ab'al pa ri Taqanik wajxaqib' rech we junab' rumal ri B'anib'al Taqanawuj, k'ak'arisam pa ri Taqanik waqib' pa juwinaq jun q'ij rech urox ik' junab' joq'o' juwinaq xuquje' ya'om chi nik'aj uq'ij pa ri Taqanik wuqub'- junab' joq'o' juwinaq, e kab'ichal ya'om kiq'ij pa ri Taqanik b'elejeb' chech we junab' rumal ri B'anib'al Taqanawuj xuquje' najtajisam uq'ij pa ri Taqanik wajxaqib'- junab' joq'o' juwinaq rech ri juwinaq q'ij rech ri ukaj ik' chech we junab', k'amom uq'ab'al rumal ri Taqanik juwinaq jun - junab' joq'o' juwinaq pa ri B'anib'al Taqanawuj. Najtajisam uq'ij pa ri Taqanik b'elejeb' rech we junab' q'atom pa ri juwinaq kajib' rech ri urox ik' rech we junab', xya' chi uq'ij pa ri Taqanik juwinaq keb'-junab' joq'o' juwinaq rech ri Banib'al Taqanawuj.

Q'ataj keb': Uxe'al. We najtisan q'ij xta'ik rech chajinem chi uwach ri k'axk'olil pa amaq' q'alijisam chi kanoq, xq'atatajik rumal chi pa taq we q'ij ri yab'il ub'i' COVID-19 tajin kjub'unik xuquje' tajin knimar ri k'axk'ol kuya pa kik'aslemal ri winaqil xuquje' q'atatal pa uq'ab' ri Q'atb'al tzij kuya uq'ij ri ya'talil taqatalik are wa' ri ub'e'al uterne'xik ri chajinem utzwachil xuquje' pwaqil rech man knimataj ta ri k'axk'ol chi kixo'l ri uwinaqil ri tinamit Paxil Kayala' xa jeri' kchupisax uwach ri uchikopil yab'il rachi'l ri k'ax kuk'am lo pa we amaq'.

Q'ataj oxib': Kunab'al sib'alaj kajawatajik. Ruma chi jeri' rajawaxik chech ri amaq' xuquje' rech uchajixik ri winaqil chi uwach taq ri yab'il, rumal wa' pa we taqanik koqixa'nik kan jujun aq kunab'al, ucholajisam kumal ri Wokaj Panamericana rech Utzwachil (OPS EML-ICU-COVID-19) are taq wa':

1. Ja' Kunab'al kokisax pa ib'och'il
2. Kunab'al pa yab'al kaq'iq xuquje' ruxlab'em ri yab'
3. Kunab'al rech ub'inisaxik ri kik'el rech kqasax ri q'oxom uxlab'em
4. Kunab'al rech yab'al chuq'ab'il pa ch'akulal.
5. Ronojel taq uwach kunab'al rech kchupisax uchikopil yab'il rech SARS-COV-2.

Ronojel taq uq'alajisaxik uwach we kunab'al koqxa'nixik man ya'tal taj che ri winaqib' kkoloq' b'i ronojel, kloq'ik are taq man k'ot no'jib'al pa uwi', kya' chi kech ri winaq we k'o jun uwijil kjuch'ik, kpaqab'ax rajij, kejach ne' chi kinaqaj ri winaq rech kkiloq'o, on man kya' taj are taq kajawatajik, xuquje' nik'aj chik kk'ulmatajem chi xa kuya k'ax pa ri patanem utzwachil rech q'atb'al tzij on man rech taq q'atb'al tzij.

Q'ataj kajib'. Sik'inem. Kya' jun sik'inem chi kech ri B'anib'al Taqanawuj rech kkiya' uq'ij pa aninaqil chech we oxib' q'ij ri', keta'maxik, kq'atik, kk'ak'arisaxik on kesax we taqanik ri' jampa' k'ut kajawatajik, kya' chi kiwach ri Uwokaj taq Q'atb'al tzij ri b'ixkil pa uwi' ri k'ulmatajinaq xuquje' ri ub'e'al uchajixik b'anom chi uwach we k'axk'olil, pacha' k'ut ri ub'e'al, uxe'al we q'ij kta'ik rech chajinem q'atatal pa we amaq', pacha' ri q'atom pa ri q'ataj 32 rech ri Taqanik pa kiwi' Uwinaqil Tinamit.

Q'ataj job'. Ujub'uxik pa ri jalajoj taq Mayab' tzijob'al rech we amaq'. Kq'at pa uq'ab' ri Mayab' Cholchi' rech Paxil Kayala', kub'an pa aninaqil ri q'axinem pa ri jalajoj taq mayab'

tzijob'al, ri Garífuna xuquje' ri Xinca, ri q'atom pa we Taqanik, rech kjub'ux ub'ixik xuquje' kkipoq'isax ub'ixik pa ronojel rulewal ri tinamit rech Paxil Kayala'.

Q'ataj waqib'. Ri ujub'uxik. Kq'atik chi ronojel taq ri Q'axib'al taq b'ixkil, xaq ta ne' e jachinoq kkipoq'isaj uwach xuquje' kkipaj ri kitob'anik chech ujub'uxik we xq'at kan pa we taqanik, ri uq'atik, ri uq'ij, uk'aka'risaxik, uk'exik taq ri taqanik, rachi'l ronojel taq taqanik kkiq'at ri Ajpopab', are taq kya'taj uq'alajisaxik pa kaxla'n tzij, pa mayab' taq tzijob'al, Garífuna xuquje' Xinca, xa jeri' kopan ub'ixik pa taq ri jalajoj taq Mayab' taq Cholchi', jachin taq ri man kkiya' ta ub'ixik kq'at q'atb'al tzij chi kij pacha' kuta ri taqanik.

Rumal k'ut xq'atataj kumal ri q'atb'al taq tzij ri ujub'uxik uwach we taqanik xaq sipatalik, jachin taq ri kkib'an taj kkanaj pa kiq'ab' ri ilon chak xuquje' ri q'atb'al tzij su kkib'an chi kech.

Q'ataj waqib'. Uq'ijol, We jun taqanik kmajitaj ukojik pa aninaqil xuquje' kya' ri b'ixikil chi uwach Diario rech Centro América.

Chya' b'a ub'ixik

